

**Illulortiternernut aningaasalersuineq pillugu Inatsisartut peqqussutaata allanngortinneqarnissaa pillugu Inatsisartut peqqussutissaattut siunnersuut.**

(Attartortup inatsisitigut pisinnaatitaasunut attartortitsinerani pisortanit taarsigassarsilluni illuni attartortitsinerami akiliutissap naatsorsornerani najoqqutassat)  
(Inatsisartut ilaasortaq Olga P. Berthelsen, Inuit Ataqatigiit)

**Akissuteqaat**

(Ineqarnermut, Attaveqarnermut Angallanermullu Naalakkersuisoq)  
**Siullermeerneqarnera**

Illulortiternernut aningaasalersuineq pillugu Inatsisartut peqqussutaanni nr. 1-imi, 7. maj 2007-imeersumi pingaarutilimmik allannguisoqarnissaa pillugu Inatsisartunut ilaasortaq Olga P. Berthelsen siunnersuummik saqqummiussaqqarpoq. Allannguinerup kingunerisaanik taarsigassarsisup inissiaq pigisani, namminersortut inissiaataanni attartortittakkani attartornermut akiliutissatut aalajangersarneqartumit qaffasinnerusumik akeqartillugu, tak. inissianik attartortitsisarneq pillugu Inatsisartut peqqussutaanni nr. 2-mi, 12. maj 2005-imeersumi, kingusinnerusukkat allannguuteqartinneqartumi § 33, inatsisitigut pisussaataaallunilu pisinnaatitaasumut attartortissimappagu, pisortat taarsigassarsiarititaat atorunnaarsinneqartalissapput.

Inatsisip allanngortinneqarnissaa, taamaalillunilu inissianik iluanaarniuteqartartut ineqarnermut akiliutinit aningaasartuutit tunngavigalugit aalajangersarneqarsimasunit qaffasinnerusumik akeqartitsillutik inissianik attartortitsisarnissaasa akornuserneqarnissaa pingaaruteqarmat, Naalakkersuisut isumaqataasorujussuupput. Tamatumuunakkut aamma inissianik iluanaarniuteqartartut inissianik inatsisitigut pisussaataaallunilu pisinnaatitaasumut qaffasissorujussuarmik akeqartitsillutik attartortitsisinnaanissaat akornuserneqarpat, inissianik pisariaqartitsinermut naleqquttumik sanaartornissaq qulaajaaffigineqarsinnaalissaaq. Taamaalilluni aamma utaqqiisaasumik inissiigallanermut ineqarnermut akigititat qaffasissorujussuanngorsimasut apparsinnaalissapput.

Inatsimmut allannguutissatut siunnersuut aqutigalugu inissarsiortorpiat taparserneqarsinnaalissasut Naalakkersuisut isumaqarput.

Aamma aappassanneerinnginnermi oqartussaasunut kattuffinnullu il.il. attuumassutilinnut tusarniaasoqartariaqartoq pillugu Naalakkersuisut siunnersuuteqartoq isumaqatigaat, taamaalilluni tusarniaanermi akissutit siunnersuummi inaarutaasumi anguniakkanut tunuliaqutaasut pitsaanerpaamik tunngavissaqartinniarlugit ataatsimiititaliap suliaqarneranut ilanngunneqarsinnaassammata.

Naalakkersuisut taamatut naatsumik oqaaseqarlutik peqqussutissatut siunnersuutip taparserneqarnissaa inassutigaa.